

etiam domina partis fortunæ est retrograda & infausta, significat quòd natus iterum disperget & comminuet acquisita.

Conclusio nona. Participationem & commixtionem suarum rerum cum rebus sociorum, & quòd in pollicitis firmus fiat in dando & accipiendo iustus; arguitur ex Luna tertia domina triplicitatis septimæ salua, licet in casu suo &c.

CAPVT DECIMVM.

De honore & dignitate nati.



Um luminaria in signis masculinis & aptis locis extiterint, ut in angulis, aut in alijs locis conuenientibus, præcipue illud, quod dominiũ temporis obtinuerit, & quinque stellæ erraticæ luminaria circumdederint, sic ut circumdantes Solem matutinales, Lunam uero ambientes uespertinales sint, natum regem fore significabunt, At si stellæ quæ circumdederint luminaria fuerint in angulis, uel si societatem habuerint in figura cum gradu decimæ & ascendentis, natus erit potentissimus, & rex mundi, & si planetæ adiuuantes luminaria fuerint fortes, & stellæ fixæ etiam cum luminaribus, maxime cum luminari temporis in eodem positionis circulo iaceant, quæ sint de uatura fortunarum, fortuna & potentia nati multum augmentabitur. Si autem unum luminare in angulis fuerit, & aliud extra angulos inuentum fuerit, & ea erraticæ stellæ circumdederint modo prædicto, fueritque Sol in signo masculino, & Luna in foeminino, decernunt nato imperium in populares iudicando homines, puniendo & incarcerando, licet ex uili progenie procedat. Quod si cum hoc stellæ luminaribus testificantes, non fuerint in angulis, nec testificentur eis per aspectum amicum, natus solum erit gubernator uillæ uel ciuitatis, uel exactor tributorum. At si sol & Luna non fuerint in angulis, sed planetæ circundantes luminaria fuerint in angulis, uel cum eis societatem habuerint, natus erit mediocris honoris in gubernando uillas, Si nec luminaria, nec stellæ circundantes luminaria fuerint in angulis, nec eos aspexerit, natus miser erit paruæ fortunæ. Cum autem luminaria nec in signis masculinis, nec in angulis fuerint, nec ipsa luminaria fortunæ circumdederint, natus erit in extrema miseria, & infelicissimus.

Cum luminaria in signis masculinis, & in angulis & fortunæ circundantes ea, fuerint de Hayz eorum, natus in ualetudine amplius durabit.

Si autem planetæ circundantes luminaria de contrario Hayz fuerint, aut infortunæ ea circumdederint, eius ualetudo debilis apparebit, & leuiter transibit. Valetudo autem & status honoris cognoscitur à planeta circundante luminaria, qui fuerit fortitudinis & dignitatis præ cæteris. Quòd si Saturnus fuerit dispositor locorum luminarium, natus multas hæreditates habebit, & in congregatione pecuniarum perseuerabit. Sed si Iupiter cum Venere dispositores fuerint, erit eius fortitudo in iocunditatibus, & donationibus, atque dignitatibus, ac magnanimitate. Si uero Mars fuerit dispositor, habebit successum in uictorijs, & suorum subditorum timore. At si Mercurius gubernator fuerit, erit in multis rebus perspicuus, ac scientijs, ac doctrinis aptus. Hæc Ptolemæus.

Aliorum sententiæ & aphorismi.

Decimam